



Vielleicht e Bris gefällig?

's isß wohr, ich bin e armer Drobb,
Un bin e armer Deiwel,
Doch hass ich drum meiⁿ Robb doch hoch
Un scheer mich an käⁿ Zweifel;
Es kann net jerer Keenig seiⁿ
Wenn wolltner kummedeere,
Wann jererähns regiere wolld,
Wann mer, es Volk, net weere?

Wie ich e junger Kerl noch war,
Do hott mir uff zeh Meile
Gefunn kenn, ders mer gleich gedahⁿ
Im Hämmre un im Feile;
Wie hat deß Eise do gekracht
Wanns unner meine Finger,
Wie hat meiⁿ Meeschter als gelacht!
Ja, frieher warn mer jinger.

Jetzt bin ich ald, jetzt bin ich groo,
Muß hiⁿ un here renne,

Meiⁿ Brinzibal dhut mich im Schbaß
„'s Mädchen for alles“ nenne .
Die Hand, die frieher deckmols als
De Hammer wußt se fiehre
Verschteht jekt aah mit Duch un Schibb
Un Beesem se handiere.

Zahldags meiⁿ ganzer Wochelohⁿ
Ich bringen meiner Alde
Dofor dhut se mich Sunndags als
Im Werrds^shaus frei dann halde.
Deß iwrigens, deß dhut se gern
Sie dhut sogar noch mähner
Un schenkt mer for meiⁿ Schnubbdumack
Manch Finferche un Bähner.

O Pris! Waß mer aah enns will sa'
Un schelle iwers Schnubbe,
's iß doch es Bescht in alde Daah
Do loßt sich nix draⁿ dubbe;
Es Raache un es Drinke hald
De Geischt lang net so hellig,
Als wie e Prisje Schnubbdumack
Vielleicht ähⁿi gefellig?